



## Terenga 6: Hōtaka 17 - He...nō...

### He Mihi

Kei te tūtara kauika o te reo, e komaingo nei ki te ako, tere mai i runga i ngā au o te moana kia kau tahi ai tātou ki te pae kōkēi o Whakapiki Reo.

### Hei Mahi Whakarongo

He waiata te pūtake o te mahi whakarongo o te rā nei. He māmā te rere o ngā kupu, nō reira kia areare mai ngā taringa ki te kapo i ngā whakautu ki ēnei pātai:

- 1) He aha te take e hau popokitia ana ngā māharahara?
- 2) Me kaupapa kino e tukituki ai te manawa?
- 3) He aha e tukituki nei te manawa?

### He Whakamārama

Ki te tīmata te rerenga kōrero ki ngā kupu '**He...nō...**', he tohu tēnā, i ētehi horopaki, kei te horahia te take i puta ai tētehi āhua, i mahia ai rānei tētehi mahi. I te nuinga o te wā, ka noho ēnei momo rerenga hei whakautu ki te pātai 'He aha ai?'.


Pātai: He aha koe i haere ai ki tōna whare?

Whakautu: **He** hiahia **nōku** ki te āwhina. *Because I wanted to help.*

Pātai: He aha koe e tangi nā?

Whakautu: **He** pōuri **nōku** i te matenga o taku ngeru. *Because I'm sad about the death of my cat.*

### He Mahi Ī-papa



Whakamāoritia te rerenga kōrero kei runga i te Īpapa.

---

---

### Hei Mahi

Whakautua ēnei pātai ki tētehi rerenga ka tīmata ki ngā kupu '**He...nō...**'

1. He aha koe i mau tarau roa ai?
2. He aha te take i kanga ai te tangata ki tana kiritata?
3. He aha a Pita i tōmuri ai ki te mahi?
4. He aha te whānau e hūnuku ai ki Taupō?

### Whakautu:

Mahi Īpapa: I tohe rāua, **he** hiahia **nō** tētahi i te taonga a tētahi.

Hei Mahi:

1. He hiahia **nōku** ki te whai i ngā tohutohu a taku kuia.
2. He kaha **nō** tana kiritata ki te whakatū pāti i tōna whare.
3. He moeroa **nōna**.
4. He pai **nō** te whaea ki tērā tāone.